

COMUNICÂT STAMPE

APROVÂT IL PLAN GJENERÂL DI POLITICHE LINGUISTICHE

FURLAN LENGHE VIVE, VE IL STRUMENT PE RIVOLUZION

Zanon: o lassî la Agenzie in linie cui obietîfs proviodûts de leç di tutele regionâl

Udin, ai 7 di Avost 2013 - Si siere cu la aprovazion dal prin, strategicjic, Plan gjenerâl di politiche linguistiche pal furlan une des ultimis sentadis dal Consei di aministrazion de ARLeF - Agenzie regionâl pe lenghe furlane sot de presidence di Lorenzo Zanon.

"O soi une vore sodisfat - al comentè Zanon - che te ultime riunion, che si è tignude in maniere simboliche te sede de Provincie di Pordenon su invît dal vicepresident Eligio Grizzo, al sedi stât fat bon il document che al inmanee lis ativitâts di promoziun e tutele de lenghe furlane, dutun cul regolament che al norme la certificazion linguistiche. A son doi ats impuartants che a son stâts elaborâts dal CTS, il Comitât tecnic sientific. La lôr scriture e je stade acelerade, daspò dai ritarts dal principi, graciis ae riforme dal statût de Agenzie dal 2011 che e à permetût al CTS di lavorâ cun plui concentrazion sui siei obietîfs. O lassî duncje une ARLeF in linie cui obietîfs de leç regionâl di tutele", al conclût Zanon.

Il Plan, che al è definît ogni cinc agns e che al sarâ valutât de Zonte regionâl, al jentre tai details di dutis lis sfidis par rivâ a fâ diventâ il furlan une lenghe fevelade e scrite in cualsisedi situazion de vite publiche e private.

Ve chi setôr par setôr, lis gnovis di plui interès.

AMINISTRAZION PUBLICHE: AUTOVIE VENETE E SCRIVARÀ PAR FURLAN

In plui di inçressi l'ûs public dal furlan - cun comunicazion istituzionâl bilengâl, ancje dal sît internet, traduzion dai ats, servizi di interpretis, sportei linguistics, afission di insegnis e indicazioni di publiche utilitât - la Regjon e varâ di garantî che la cartelonistiche stradâl presinte tal teritori delimitât di competence di FVG Strade e di Autovie Venete e vedi i toponims ancje in lenghe furlane.

I stes obietîfs a son domandâts ai ents locâi e aes Aziendis sanitariis che, par ricevi finanziaments di bande de Regjon, si impegnin a fâ bon un lôr Plan speciâl di politiche linguistiche (PSPL) cul jutori de ARLeF.

FORMAZION: DOME INSEGNANTS "CERTIFICÂTS"

Il Plan al individue te formazion dal docent il fat decisîf par otignî un bon nivel di cualitât tal insegnament de lenghe furlane.

In rivuart ae atestazion des competencis di caratar didatic, la ARLeF e stabilirà chês di fonde, cul coinvolziment de Universitât di Udin. Lis competencis linguistiche e didatiche a saran lis cundizions par jentrâ tal Elenc regionâl dai insegnants, fat che vuê nol è fondât su di un titul ciert e compagn par ducj.

MIEÇS DI COMUNICAZION: DENTRI DI CUATRI AGNS UN TG RAI CUOTIDIAN

Un notiziari televisîf cuotidian in RAI. Al è chest il travuart plui ambiziôs che il Plan al vûl viodi atuât a cuatri agns de jentrade in vore. Di tancj agns si sperde di viodi atuade une situazion che e je reatât consolidade par altris minorancis linguistichis prudeladis de 482/99.

In spiete che la Regjon e concretizi la tratative cul Stât par inserî chescj obietîfs te convenzion Ministeri/Concessionari dal servizi public radiotelevisîf, cun finanziaments statâi, il Plan al travuarde a doi agns altris risultâts: un notiziari radiofonic cuotidian e l'ûs di sot titulazions par furlan a supuart dai notiziariis televisîfs tal servizi public radiotelevisîf (in forme di strisse di gnovis che a corin sot vie pal telegjornâl o tant che somari dai titui) par favorî la progressive alfabetizazion dal telespetatôr. Te cjarte stampade dentri di cinc agns al ven providût un cuotidian di plante fûr par furlan.

INTERNET: STANDARD PAR REALIZÂ SÎTS WEB E APPS

Tal Plan e je une grande part su lis gnovis tecnologjiis che a son consideradis tant che strument decisîf par pandi la lenghe massime jenfri i zovins: il document al da indicazioni par realizâ sîts web e aplicatîfs par smartphone, iPad, e vie indevant...

ASSOCIAZIONI: IN PRO LOCO SI FEVELE E SI SCRÎF FURLAN

Lis aministrazions locâls, cui Plans speciâi di politiche linguistiche, a judaran lis associazions sul lôr teritori (centris estîfs, pro loco e vie indevant...) par fâ jentrâ planc a planc la lenghe furlane tes lôr ativitâts.

I Ents a cjapitul, invezit, a varan di fâ plui di presse: dentri di doi agns a varan di realizâ almancul il 70 par cent de lôr ativitât in lenghe furlane o, mal che al ledi, in version bilengâl.

SOCIALIZAZION DE IDENTITÂT: I VOLONTARIS DE MARILENGHE

Dal dut gnove la ativitât di "Volontariât pe lenghe furlane" che e vignarà inviate par cure de ARLeF a un an de jentrade in vore dal Plan cul obietîf di meti in contat personis che a vuelin imparâ a fevelâ il furlan o miorâ la lôr cognossince cun cui che lu fevele za benon e che al vûl fâ il volontari de "conversazion" dibant. Compit de Agenzie al sarà chel di facilitâ, cu la costituzion di un registri, l'incuintri jenfri dôs personis che po a decideran in autonomie cuant incuintrâsi e cemût davuelzi il program.

CUMIERÇ E IMPRENDITORIE: IL FURLAN AL CONVEN

Il Plan al individue tant che strategjics i setôrs dal cumierç e de imprenditorie pe politiche linguistiche e par chest al promôf cun fonts regionâi, par mieç de ARLeF, la realizazion di une campagne di coinvolziment des categoriis economichis, massime chês comerciâls, dai esercizis publics e de ristorazion. La campagne e spiegarà i vantaçs dal ûs de lenghe furlane tal rapuart jenfri esercent e client e de sô presince tes campagnis pubblicitariis.

Elisabetta Pozzetto

Region Autonome Friûl Vignesie Julie

[ARLeF - Agenzie Regionâl pe Lenghe Furlane](#)

0039 0432 555724 mob 0039 335 8002058